

## Bi de Hitze is vell passeert

Dertig Grad Wärme wörn in dän lesten Dagen nich selten. Buten un ock inne Hüser wast fast unerträglich. Jäider sochte Köhlung. Frittken un Hennerich han'n sick Sonndag non Middagerten in'n Schatten tuargen, buten tiergen dän Honnerstall. Frittken hadde sick up'n Kisten settet, un Hennerich hadde sick'n Brett üarwer son utrangierten Waspott lägg, de anne Siete stund un vull Water was. De Pott was etwas inne Ärn inlauten, un Frittken sinne Fruwwe sprengte des Aumds met dän afgestauhten Water Bloumen un Petersilgen.

Hennerich feile nich vell an twähunnert Pund. He hadde sick ersachte dahllauten up dat Brett, owwer met dän Kürn hadde he de Vo-sicht met de Tied vogerten. Frittken was 'n Dübelsbänner. He saug gans genau, dat dat Brett, wo Hennerich uppe satt, ümmern gröterren Buargen no unner make, owwer anstatt Hennerich to warnen, kür he män ümmer widder un lur ölln Fofß up de Dinge, de komm'n mössen. Lange bruke he nich mä to töim. Äin Knall, äin Schreckensroup, un Hennerich sin Mittelstücke satt däische in dän Pott. Dat Water was hauge sprützet, denn wo so twähunnert Pund henschlaut, do mot Platz maket wärn. Dat Dullste was, dat Hennerich ers nich ut dän Pott harut kann, denn dat Schwouergewicht satt unner, un blouß de Föite un de Kopp bümmeln üarwer dän Rand von dän Pott, un Frittken kann vo Lachen nich hölpen. Endlick hadde sick Hennerich ut dän Pott weltert, in dän nich mä vell Water was. Owwer Hennerich saug ock dono ut. „Junge“, mäine he, „wenn blouß nich de Farbe von minne blauen Büchsen in min wittet Sonndagshemd tüht, süß is bi mi to Huse de Dübel losse.“ Owwer Frittken siar: „He soll sick män up'n Buk uppe Bläike inne Sunne leggen, bi de Temperatur wör de Büchsen intied von nicks we drüge.“

Hennerich packe sinne twähunnert Pund in't Gräs, und de Sunne lache met vullen Backen up Hennerich sin Ächterkermesel. Frittken beobachte dän Prozeß ut'n Schatten an'n Honnerstalle, un öll he merke, dat allmählich Domp ut Hennerich sinne Büchsen steig, do wußte he, dat de Dicke baule munter word. Un richtig, öll wenn se Hennerich plötzlick son Brennglas achter vo hauln hen'n, so flaug he inne Höchte un reif sick sin Ächterdäil.

„Junge, Junge“, siar Frittken de Schoufelbach. „Du häs vondage doch

---

Pech met din'n volängerten Rügstrang. Ers woll he sick vosupen, un nu wör he di baule vobrennt.“

---